

Roxanne Alphonso:

Un desabilidad no ta motibo pa un hende no funciona normal den comunidad

HOPI biaha den bida tin cosnan cu ta sosode di un rato pa otro cu ta cambia nos bida den un habri sera di wowo. Desicionnan cu nos ta tuma cu por cambia nos bida completamente. Den un entrevista cu Roxanne Alphonso el a conta nos con un accidente a cambia su bida ful y con cu su storia e

lo kier haci un cambio den bida di otronan y encurasha nan pa sigui dilanti. Par di aña pasa el a bolbe bek Aruba for di Merca pa asina yuda un yiu di dje cu tabata malo. E tabata miembro di un Iglesia na San Nicolas y e weekend di su accidente el a haya un bus di e Iglesia pa asina busca y hiba e hendenan Iglesia.

E anochi di 21 di oktober 2010 e tabata sinti diferente y asta a cancta un cancion di Alabansa na su Iglesia, cos cu e no sa haci asina sin mas paso e no ta un bon cantante, pero asina mes e anochi ey algo a bise pa canta y el a haci esaki.

Despues di sirbishi el a hiba algun miembro di e iglesia cas laga un di nan a perde nan yabi cas. Nan a bolbe bek Iglesia pa busca e yabi y a bin hayanan den e parkinglot di e iglesia. Bolbiendo bek Village pa baha e señora na su cas, nan a haya nan mes involvi den un accidente grandi n'e cruzada di Springfield y Lagoweg. Un chauffeur burachi a bin dal den e bus cu consecuencia cu esaki a bolto. Roxanne a dal su cabes den e windshield y su man robes a keda pega bou di e bus. Apesar di e gravedad di e accidente Roxanne ta sobriebibi pero ta perde su braza. Aunké cu el a haya sla pisa na cabes y mester a cose su cabes cu 32 stitch, e ta gradici Dios tur dia cu e no a keda cu daño permanente na su cabes.

Awor ta tres aña caba cu e accidente a tuma lugar y aunke cu el a sigui cu su bida na e forma mas normal posibel, e ta bisa si di ta haya falta di su braza. Cu su storia Roxanne kier alerta hendenan riba e gravedad di core bou influencia di alcohol. Esaki ta peligroso no solamente pa e chauffeur mes pero tambe pa otro hendenan inocente riba caminda cu lo bira victima den un accidente cu nan no tin culpa di dje. Ora un persona dicidi di core bou influencia di alcohol, e ta tuma un decision cu por tin influencia riba bida di otronan. Roxanne ta gradici Dios tur dia cu el a sobriebibi y cu Dios ta dun'e forza pa sigui p'adilanti.

Un desabilidad no ta hacibo un persona incompleto

E echo cu Roxanne a perde su braza ta hacie awor un persona desabilita cu no por haci tur trabou mas. E ta salud pero e falta di un braza ta pone cu e no por haya trabou facilmente ya cu



Roxanne Alphonso (e di 4 persona riba e potret), mei mei di su coleganan di FUNOM, cu kendenan e ta duna un man na adiccionan ambulante pa nan por sali di adiccion y reintegra den comunidad

hendenan tin e percepcion cu e falta di un braza ta hacie handicap den tur sentido. Den pasado Roxanne tabata un casino dealer. E funcion aki el a ehersce na Aruba pero tambe na Merca den diferente casino. Tin diferente trabou cu Roxanne ta kere cu e por haci apesar di su desabilitacion y e ta sigur cu e lo por tin un balor adicional pa Aruba pero e no ta haya e chens pa demostra esaki. Banda di tabata un casino dealer Roxanne studia tambe pa enfermera y e ta specialisa den e enfermedad di Alzheimer. E ta un habitante di San Nicolas y e ta wak hopi potencial y bida bek den San Nicolas y e ta sigur cu e lo por duna su aporte na comunidad.

Roxanne ta kere cu si portanan habri pa hendenan cu tin un desabilidad y nan haya e oportunidad di traha den algo cu nan desabilidad no tin influencia, nan por nifica algo pa e mercado laboral, enbes di biba di un uitkering di Gobierno. E no sa e cantidad di hende na Aruba cu ta falta un parti di nan curpa pero e ta sigur cu hopi di nan lo por yuda di un forma of otro den e mercado laboral enbes di biba di un onderstand. Hendenan ta lubida cu cu e falta di un man of pia no ta hacibo un persona incompleto. Bo ta keda e mesun hende.

Banda di e abuso di alcohol den nos comunidad tin un

otro aspecto cu ta preocupa Roxanne. Esaki ta e aspecto di uzo di droga. E mes ta un ex-adicto y tin hopi aña clean caba. El a cura cu yudansa di un iglesia y el a escohe e caminda di Dios. E ta sigur cu e lo por yuda tambe riba e tereno aki incluyendo e aspecto spiritual. Como un hende cu tambe a pasa den adiccion, e por compronde mihor kico e hendenan ta pasa aden durante nan proceso di recuperacion. Roxanne ta enfatisa cu tur hende por bai p.e. Santo Domingo na un clinica pa recupera di nan adiccion pero si nan no ta prepara pa e proceso di reintegracion den comunidad, cosnan por bai robes bek. Ta importante pa traha riba e aspecto di spiritualidad tambe.

Legalisacion di marihuana ta un engaño

Awoki cu tin e discucion andando riba legalisacion di marihuana, Roxanne no ta kere cu legalisacion ta e solucion. Como un hende cu a pasa den e mundo ey, e ta di opinion cu legalisacion di marihuana no ta e solucion paso den mayoria caso hendenan ta bai di marihuana pa droganen mas pisa. Según Roxanne, e echo cu ta uza e aspecto medicinal pa por haya mas hende duna sosten na e causa dilegalisacion ta un engaño, paso mayoria hoben ta uza marihuana pa nan bira high y no pa propositonan medicinal.